




Kriegsbuch


I

5

N^o 3^d

Zur Befehlshaber des Königs, Kollonnenführer
Militär und Infanterie





DISPV TATIO THEOLOGICA 24
DE
RECTO ET GENVINO VSV
ARGVMENTORVM FIDEM HV-
MANAM FACIENTIVM IN PRO-
BANDA DIVINA ORIGINE
S. LITTERARVM.

QVAM
PRAESIDE
VIRO SVMME REVERENDO, EXCELLENTISSIMO,
DOCTISSIMO
IOANNE GEORGIO KNAPP
THEOL. DOCT. EIVSDEMQUE PROF. ORDIN.
PATRONO SVO AC PRAECEPTORE
PIE COLENDO,
IN REGIA FRIDERICIANA
D. I. OCTOB. MDCCLVII.
ERVDITORVM EXAMINI SVBIICIET
AVCTOR
CAROLVS SAMVEL BAER
KERBELITZA-MAGDEBVRGICVS.



HALAE MAGDEBVRGICAE
LITTERIS HENDELIANIS.

DISPUTATIO THEOLOGICA
DE

RECTO ET GENIINO VSV
ARGVMENTORVM THEOL. IN
MANAM FACIENTIUM IN PRO
BANDA DIVINA ORIGINI
A. S. LITTERARVM

FRÆSIDE

VIRO SVVM REVERENDO, EXCELLEN-
TISSIMO DOCTISSIMO

IOANNE GEORGIO KNAPP

THEOL. DOCT. PIVSDEMO VROT. ORDIN.

PATRONO SVO AC PRÆCEPTORE

IN COLONIA

IN REGIA FRIDERICIANA

D. N. OCTOB. MDCCLVII

PRÆDICTORVM SENATUS ACADEMICI

ACTOR

CAROLVS SAMVËL BAER

DOMINO SVO ET PATRONO

IN HACAE MAGISTRALIS

LITTERIS REVDICANDIS



PERILLVSTRI
GENEROSISSIMO ATQVE EXCELLENTISSIMO
DOMINO
IOANNI FRIDERICO
AB
ALVENSLEBEN,

POTENTISSIMI MAGNAE BRITANNIAE REGIS,
ET ELECTORIS BRVNSVICENS. ET LVNEBVGENS.
PRAEFECTVRARVM SVMMO PRAESIDI,
DOMINO HAEREDITARIO IN NEVGATTERSLEBEN,
HVNDISBURG, ROGAETZ, GLOETHA, RELIQA:
NATALIVM SPLENDORE, MVNERVM DIGNITATE INCLITO,
ET FAVORE IN REM LITTERARIAM MAXIME
CONSPICVO

DOMINO SVO ET MAECENATI
OMNI OBSERVANTIAE ET PIETATIS CVLTV
NVNQVAM NON PROSEQVENDO;



HANC QVALEMCVNOYE DISSERTATIONEM,
CEV PRIMITIAS ACADEMICAS
IN ANIMI GRATISSIMI,
ET OBSTRACTISSIMI TESSERAM,
CVM
SINCERIS PRO EXOPTATISSIMA SALVTE,
ET INCOLVMITATE CVM IPSIVS,
TVM TOTIVS
PERILLVSTRIS
DOMVS AB ALVENSLEBEN
VOTIS

DICARE, ET CONSECRARE,
SIMVLQVE
SE SVASQVE RES ILLIVS INDVLGENTIAE,
ET PATROCINIO,
SVMMA MENTIS VENERATIONE COMMENDARE
VOLVIT

OBSERVANTISSIMVS CLIENS
CAROLVS SAMVEL BAER.



Q. D. B. V.

PROOEMIUM.



ogitantibus nobis de argumento ex mandato clementissimi Regis nostri disputando, visum est, quaedam ex articulo de scriptura sacra deligere & pro virium modo tractare. Res omnino maximi momenti est, certam & persuasam habere originem divinam eorum librorum, quibus tota religio nostra superstructa & innixa est. Salus & vera felicitas hominum sola in eo consistit, ut Deum summum bonum rite agnoscant, eo fruantur, eumque in spiritu & veritate adorent, & colant, quod vero nullo alio modo iuste & legitime fieri potest quam eo, quem Deus ipse praescripsit: ficta enim ad humanum arbitrium religio Deo probari non potest. Optime itaque meriti sunt de aliis, qui studiosè ac diligenter originem divinam SS. litterarum & probare & vindicare ab objectionibus sibi sumserunt *). Quod negotium vero duplici ratione suscipi potest, ita ut vel argumenta fidem humanam facientia in probando ortu divino SS. litterarum pertractentur, vel ostendatur, quomodo per spiritum Dei eiusque operationes gratiosas homines

A
ortum

*) Quorum pertinent AEGIDIJ HUNNII tract. *de divina scripturae sacrae maiestate & auctoritate.* PETRI DANIEL. HVETII *demonstratio evangelica.* JOH. FECHTII *Diss. de mediis cognoscendi existentiam & divinitatem scripturae sacrae.* JO. MUSAEVS *in introduct. in Theologiam:* ut recentiores admodum multos taceamus.

ortum divinum scripturae sacrae certum habere possint. Quod si prius agitur, aliqua saltem certitudo, vel si mavis summa probabilitas ad certitudinem suo modo prope accedens, a priori enascitur; sin vero posterius, fluit inde cognitio & certitudo ortus divini SS. litterarum a posteriori. Nos autem nobis sumimus, argumenta quaedam fidem humanam facientia in probanda origine divina SS. litterarum declarare, eorumque usum genuinum brevissime ostendere; hinc scriptio nostra versatur circa probationem originis divinae SS. litterarum a priori. Multorum hominum a Deo alienorum maximus labor eo tendit, ut divinam originem litterarum sacrarum vel plane negent, vel saltem dubiam reddant, quae si iacet, etiam tota religio sacris litteris superstructa, corruat necesse est. Eiusmodi hominibus hac nostra scriptio, qualiscunque sit, obviam ituri, & monstraturi sumus, argumenta, quibus eiusmodi homines ad autoritatem divinam scripturae sacrae subvertendam vtuntur, roboris nihil habere, sed ex parte potius ad illam stabilendam aliquid conferre. Cum etiam sint & fuerint, qui argumenta fidem humanam facientia in probando divino ortu SS. litterarum plusquam decet negligant, & certitudinem de ortu divino harum litterarum experientia seu a posteriori obtinendam, tantum admittant, hanc unicum approbationem semper & ubivis sufficere statuentes, huius etiam erroris rationem habebimus. Quae cum ita sint, scriptum nostrum dividitur pro rei natura in partes duas. In priori enarramus argumenta quaedam fidem humanam facientia in probanda origine divina SS. litterarum, & in posteriori ostendimus verum & genuinum horum argumentorum usum. Faxit Deus Optimus Maximus, ut etiam hic conatus noster cedat in eius honorem atque gloriam, & in lectorum benevolentium utilitatem.

PARS



P A R S I.
DE
ARGVMENTIS FIDEM HVMANAM FACIENTI-
BVS IN PROBANDA DIVINA ORIGINE
SS. LITTERARVM.

§. I.



um bonae methodi fit, stabilire definitiones, quibus positis fundamenti loco cum ambiguitas omnis tollatur, tum res ipsa melius expediatur, non abs re fore immo potius necessarium esse putamus, ut ante omnia enodemus quid intelligi velimus per fidem humanam, per argumenta fidem hanc facientia in probanda divina origine SS. litterarum, & per originem divinam scripturae sacrae. Fides strictè sumpta, est assensus propositioni cuidam ob testimonium alicuius datus, hinc requiruntur ad hanc fidem in aliis excitandam tantum testimonia. Saepissime vero haec vox significatu latiori adhibetur, ad assensum propter argumenta certa datum cuidam rei nondum extra omnis dubitationis aleam positae denotandum. Fides humana est cognitio ac convictio, quae aut testimonio mere humano aut alia quadam ratione probabili, aut utroque simul nititur, soliusque etiam naturae viribus comparatur, adeoque non semper simpliciter certa, sed interdum modo verisimilis est. Qua in re varios gradus locum habere posse facile apparet. Argumenta sunt rationes ex quibus cognoscitur cur aliquid fit vel accipiendum vel reiiciendum, hinc sunt argumenta fidem humanam facientia rationes, quarum usu legitimo cognosci potest sacras litteras suam originem a Deo ipso ducere. Origo vero SS. litterarum divina in eo ponitur, quod

A 2

Deus

4 De recto & genuino non argumentorum fidem humanam

Deus non modo res ipsas, sed verba etiam litteris consignanda viris spiritu suo actis suggesserit: non sufficit, ut Dei permissione & virium naturalium donatione liber quidam sit exaratus, hoc enim respectu omnes libri mere humani appellandi essent divini, sed necesse est, ut scriptor libri divini a Deo ipso sit excitatus & vir vere Θεοπνευστος.

Vocabulum fides varie solet accipi vel de fide salvifica, vel de fide morali, vel de complexu veritatum divinarum, sed de his nobis non est sermo: nos potius in praesenti hanc vocem tam late sumimus, ut in spho iam monitum est. Epitheton humana fides denotat, quod per fidem humanam intelligatur cognitio probabilis, quae ex argumentis a ratione deductis soloque usu rationis legitimo rite tractatis, nec non ex testimonio humano oritur.

§. II.

His praemunitis pergimus ad argumenta ipsa, quorum usu legitimo ortus divinus SS. litterarum nobis persuaderi potest; quaeque dividi solent commode in interna & externa. Interna sunt, quae ex ipsa indole atque natura totius scripturae sacrae desumuntur, ac proinde cum a forma illius externa, tum a materia & ipso argumento eiusdem, seu a rerum ipsiusque doctrinae sacrae affectionibus. Externa argumenta vero sunt, quae extra scripturam a rebus externis cum scriptura tamen coniunctis petuntur. In praesenti initium facimus ab argumentis internis & quidem a forma scripturae sacrae externa desumtis. Placet vero ex causis idoneis ipsa vocabula, sententias, & libros ex illis constantes, totumque orationis genus, formam scripturae externam; res vero ipsas oratione expressas ac signatas, materiam illius appellare; licet nos non fugiat, alios his vocabulis artis paullo aliter uti.

§. III.

In argumentis internis, a forma externa SS. litterarum petitis, primo numeranda videtur stili simplicitas in scriptura sacra

cra obvii. Quae potissimum in eo consistit, ut verba & sententiae ad repraesentationes commotionesque animi debitas excitandas aptissimae ac facillimae, rebusque praeterea ac personis convenientissimae sint adhibitae; ut quilibet homo ceteris paribus sive sit emunctae sive obesae naris, veritates maxime ad salutem ipsi scitu necessarias facile cognoscere possit. Per hanc simplicitatem ergo abest a stilo sacro studium in verborum phrasiumque elegantis inveniendis & excogitandis adfectatum nimisque exquisitum, ex vana sibi aliisque placendi laudemque inanem consequendi cupiditate ortum. Pertinet ergo etiam eo, ut tautologiae & voces inanes in scriptis humanis facillime vel de industria adhibitae, nec non subtilitates artificiales & nullius, ad summam rei quam scriptura agit, momenti, omnino absint. E contrario autem voces rebus describendis optime respondent & hominum modo repraesentandi, nec non usui loquendi maximopere conveniunt. Hinc Deus sapientissimus ad explicandas hominibus ideas universales & abstractas, effictionibus sensualibus, exemplis atque allegoriis usus est. Eiusmodi igitur coniunctionem sermonis vocationumque visitarum & foecundarum in SS. litteris offendimus, ut animi hominum haec scripta legentium moveri, & ad finem exarationis horum librorum obrinendum felicissime perducere possint.

Not. I. Cum loquimur de stili simplicitate scripturae sacrae, cavendum est, ne hoc intelligatur de omnibus ac singulis sermonibus & locutionibus passim obviis. Referuntur enim & enarrantur saepissime sermones hominum vanorum & superbientium, quos referre Deo sapientissimo bene visum est, at nobis est sermo de stilo sermonum, vel ipsius Dei vel virorum per instinctum spiritus sancti loquentium.

Not. II. Cavendum est, ne usus vocum abiectarum ac nimis vulgarium habeatur pro simplicitate stili. Eiusmodi simplicitatem falso ita dictam, ex sacris litteris exulare videmus.

§. IV.

Alterum argumentum internum a forma externa scripturae sacrae desumptum, sistit maiestatem & gravitatem stili librorum divinatorum, quae in eo ponitur, ut res gravissimi momenti, maxime illae, quae summum Numen eiusque relationem erga homines ipsi subiectos spectant, vocibus gravibus, nervosis & attentionem hominum eorumque admirationem excitantibus sint expressae. Ex quo fluit prono alveo, ut in verbis & sententiis talia, quae Deo altissimo dedecori esse, aut attributorum ipsius celebrationem imminuere gloriaeque eius obstare possent, in litteris divinis non reperiantur. Quod si vero res vel per se obscoenae vel propter verecundiam cum honoris praefatione tangendae, in libris divinis ob nexum cum aliis memoria dignis enarrandae sunt, maximo cum pudore & maxima cum cautione, atque vocibus maxime decentibus consignatae sunt, ut autorem divinatorum librorum sanctissimum prodant. Quae autem faciunt ad excitandum, ut honorem Deo summo debitum rite praestemus, ita aliis rebus sunt intermixta, ut tamen maiestas sanctissima, qua Deus super omnia eminet, & dominium absolutum in omnes res creatas plane non immi- nuatur, quamvis oratio mirum in modum ad ingenium hominum eorumque caprum benigne simul sit accommodata. Maiestas stili, qua Deus usus est, ex eo etiam apparet, quod interdum res gravissimas maxinique ponderis brevissimis verbis cum summi imperii significatione expressas hominibus iniunxit exequendas, & illo iure, quo reges huius mundi utuntur, pro autoritate summa voluntatem suam manifestavit sine ulteriori rationum moventium enarratione. Huius rei testis est illa lex divina triplex Mofi data, de cuius partibus & praeceptis singulis nullam cum daret, reddidit hominibus rationem. Hanc maiestatem stili biblici & gravitatem deprehendit vel ille ipse ethnicus DIONYSIVS LONGINVS, rhetor celebris, qui in libro

περὶ

neque vix sequentia verba latine translata de Mose ponit; *Moses iudeorum legislator fuit vir non vulgaris, quandoquidem Numini potentiam pro dignitate notam fecit declaravitque statim initio prooemii legum suarum scribens; dixit Deus; fiat lux! & facta est. Fiat terra! & facta est. Huic testimonio hominis ethnici addimus verba ipsius apostoli Pauli qui I Cor. II, 4. neque oratio mea, inquit, neque praeconium meum scilicet versatum est in persuasoriis humanae sapientiae verbis, sed in demonstratione spirituali atque potente.*

Quilibet caveat sibi, ne maiestatem stili librorum divinorum solo usu loquendi apud nos recepto & nostrae linguae dictionibus metiatur. Non eadem enim est ratio linguarum sanctarum & nostrarum, ut potius respectu stili toto in multis coelo differant. Quae apud orientales aut hodie adhuc aut olim pulchre & graviter expressa sunt, illa nobis nostro sensu longe aliter saepe & minus nitida videntur. Ex quo apparet eum, qui sensus scripturae sacrae plenitudinem verborumque foecunditatem & vim, nec non stili maiestatem inspicere cupit, non solum verborum significationes per se, sed etiam linguarum sanctarum idiotismos, quos vocant, familiares sibi reddere ac proinde ex fontibus iudicare debere. Conferri de stilo *Scripturae S.* omnino meretur elegantissima ROE. NOYLEI *Commentatio de stilo scripturae S.*

§. V.

Argumenta interna & quidem a materia ipsa scripturae sacrae desumpta, spectant veram conditionem & affectiones rerum quae illa continentur, verbisque signatae sunt. Primum argumentum huius generis petitur a veritate rerum sacra scriptura comprehensarum, ut quae in SS. litteris tractantur & enarrantur, ita se habeant ut docentur, non inter se pugnent, nec aliis rebus & veritatibus aliunde petitis repugnent. Quae in sacris litteris occurrunt, commode dispecisci possunt in facta, dogmata, & vaticinia, quorum veritas evincenda est. Quod ad facta in scriptura recensita attinet, sine magno labore horum veri-

veritas probata redditur. Quodsi internam rerum naturam consideramus apparet, res factas & enarratas in SS. litteris, vel facile fieri potuisse ac debuisse, vel saltem nihil absurdi aut quod plane impossibile fuerit in se continere. Historiarum sacrarum veritas eo etiam haud raro suffulcitur, quod historiae in SS. litteris enarratae conspirant, quod ad summa capita attinet, cum recensione scriptorum profanorum, qui historiam praesertim Iudaeorum tetigerunt. Id etiam mirum quod Iudaei ipsi Christo insensissimi quaedam de eius discipulis, miraculis, vita atque morte quamvis malo animo memoriae prodiderunt, & hoc modo veritati historiae N. Testam. vel inscii & inuiti consuluerunt.

Not. I. Affirmavimus quidem in SS. litteris nullam dari contradictionem; id vero intelligi volumus de contradictionibus veris, non autem de opinatis; siquidem contradictiones opinatae non sunt contradictiones veri nominis. Eiusmodi contradictiones quas barbare licet vocant *apparentes*, multiplicantur & minuuntur, prouti id fert lectorum conditio ratione ingenii & voluntatis.

Not. II. In referendis historiis profanis scriptores sacri quidem breviores fuerunt, id tantum excerptantes quod cum aliis rebus notatu dignioribus cohaeret, quod vero ex fine quem scriptores sacri sibi habuerunt propositum, est diiudicandum; unde saepius res notabiliores tantum protulerunt in medium; contra quae minoris erant influxus vel nihil plane ad ipsorum faciebant institutum sapienter praetermiserunt.

§. VI.

Ad veritatem contentorum in SS. litteris pertinet etiam dogmatum expositorum veritas, quae sunt vel credenda vel agenda. Scriptura sacra profert doctrinas, quae non solum veritatibus ex ratione cognoscendis non contradicunt, sed quae etiam partim ex rationis lumine cognoscuntur, partim veritatibus iam cognitis maiorem affundunt lucem, ita ut doctrinae scriptu-

scripturae sacrae & rationis optime conspirent. Si vero scriptura sacra ad finem propositum consequendum sufficere debuit, eiusmodi etiam doctrinas illa contineri oportuit, quae ex lumine naturae, & rationis usu aut investigari primo & aperiri, aut patefactae etiam comprehendi tamen nequeunt. De his autem observandum, quod hae doctrinae quidem sint supra rationem positae, sed tamen veris certis atque universalibus principiis sanae rationis non repugnent. Quod ad agenda attinet, quae scriptura exponit, illa quoque veritatibus sanae rationis non repugnant, ut potius principiis evidentissimis ex humanae naturae aliarumque rerum consideratione fluentibus confirmentur, ut rectissime Paulus pronuntiaverit, *legem Dei esse sanctam, iustam & bonam*, Rom. VII.

Ex eo nata est illa divisio articulorum fidei in mixtos & puros. Mixti quidem ex ratione etiam cognosci possunt, saltem quod ad maximam partem, sed scripturae sacrae ope longe facilius, simplicius, & ad usum aptius discuntur. Articuli puri vero mysteria divina capiti rationis humanae sibi relictae plane superiora explanant.

§. VII.

Vaticiniorum divinatorum veritas paucis etiam tangenda ac vindicanda est. Vaticinia sunt praedictiones rerum futurarum, & quidem contingentium. Scriptura sacra referta est vaticiniis de futuris contingentibus, quae libera hominum Deique voluntate post multa saecula eventura erant. Quae nostro aevo dividi possunt in impleta, & adhuc implenda. In impletis numeratur e. g. vaticinium de gentis iudaicae servitute sub aegyptiorum regum imperio, eiusque liberatione Gen. XV, 13. 14.; de altero excidio urbis hierosolymitanae Dan. IX, 16, & de rebus innumeris aliis, quas nemo mortalium sibi ipsi relictus, nec praenoscere, nec praedicere potuit. Ex impletione vero horum vaticiniorum impletio eorum, quae restant, iure quodam conficitur, suo tempore certissime quoque expectanda.

B

§. VIII.

§. VIII.

Secundum argumentum internum a materia scripturae sacrae petitum, sistit rerum in SS. litteris obviarum sanctitatem. Sententia nostra non est haec, ac si omnia, quae in SS. litteris exponuntur essent per se sancta, ut nil mali in se contineant; sed id volumus, facta, dogmata, vaticinia in illis exposita tendere ad celebrationem summi numinis, & ad vitam sanctam homineque dignam efficiendam esse aptissima. Haec duo itaque momenta constituunt sanctitatem rerum in SS. litteris obviarum, primo, ut illis homo ad veram cognitionem & Dei cultum sincerum ducatur, & secundo, ut ad vitam erga se, & proximum sobrie & iuste traducendam impellatur. Hinc omnino res eiusmodi statum animi hominum efficientes, atque hominem ad Numen illud sanctissimum rite colendum ducentes, iure vocandae sunt sanctae.

§. IX.

Tertium argumentum quod materia scripturae sacrae exhibet, SS. litterarum complectitur sufficientiam ad finem, cuius obtinendi gratia hominibus datae sunt, i. e. ad veram & aeternam salutem. Quae tradit scriptura sacra, ea sufficiunt & valent ad id, ut Dei perfectiones hominibus notissimae fiant, quarum viva cognitione ad honorem ipsi tribuendum impelluntur. Plura enim quam ratio nobis exhibet, Deus ipse de essentia sua, attributis infinitis, & voluntate erga nos, atque imprimis etiam viam rectam, atque certam salutem aeternam impetrandi, quam alioqui plane nesciremus, distincte nobis manifestavit; ita ut insufficientia veritatum scitu necessariarum prorsus non possit evinci, contra vero experientia, & sensu interno probetur, hanc viam salutis divinitus commendatam terentes, ad possessionem verae salutis & beatitudinis pervenire. Via salutis liquido demonstrata exponit, quomodo peccator cum Deo offenso possit in gratiam redire, quam doctrinam nullibi, quam in sacra scriptura explanatam deprehendimus.

§. X.

§. X.

Cum argumenta interna pro scripturae sacrae ortu divino huc usque brevissime tetigerimus, sequitur, ut secundum divisionem argumentorum fidem humanam facientium in probanda origine divina §pho II. exhibitam, de argumentis externis quoque pauca disseramus. Ab antiquitate SS. litterarum initium capimus. Quod argumentum non tam libros Novi Testamenti, quam praesertim libros Veteris Testamenti respicit, utpote qui non solum in numerum librorum antiquissimorum sunt referendi, sed ipsi sunt ex parte saltem antiquissimi, ut nullos habeamus libros hisce antiquiores: Triplex vero antiquitas ad libros sacros relata, venit in considerationem. Primo consideratur doctrinarum antiquitas, quas exponit scriptura sacra, de huius universi origine, de initiis temporum, de ecclesiae primordiis, de ortu peccati & id generis alia. Secundo perpendenda est antiquitas causarum ministerialium. Quae respectu potissimum Moses scriptor ille antiquissimus commemorandus videtur, qui rerum exterarum historicos, philosophiae & liberalium artium doctores suorum librorum conscriptione longe antevertit, ita, ut pentateuchus prius iam exstiterit, quam ullus alius liber, qui adhuc extet. Tertio etiam loco non est negligenda, saltem ex plurimorum sententia, antiquitas linguae. Notum est omnibus scripturam sacram Ver. Testament. lingua ebraica esse conscriptam, quae, ut vulgo putatur, antiquissima est, immo prima ac simplicissima.

Quae somniantur de libris Adami, Abrahami, fundamento omni probabili plane destituuntur, ut potius corruant necesse est, simulac rerum contentarum qualitas, linguae aliarumque circumstantiarum ratio penitus introspectitur. Firmissimo itaque talo innititur, quod saltem libri Moysi sint omnium antiquissimi.

§. XI.

Inter argumenta externa non minus numerari debet, conditio



ditio & qualitas eximia auctorum sacrae scripturae, qui quasi amanuenses Dei habendi sunt. His viris divinitus afflatis, illae duae bonorum scriptorum virtutes notissimae, rerum tradendarum scilicet scientia accurata, & amor veritatis sine affectuum partiumque studio sincerus, nulla probabili ratione denegari possunt. Res describendas potuerunt ita consignare, ut necesse erat, quoniam subsidia necessaria praeferim in historicis habuerunt, quinimmo plurimarum rerum ipsi fuerunt *αυτορται*. Voluntatem & veritatis amorem eo potissimum testati sunt, quod verbum divinum sine ulla personarum re peccatus ratione habita, & praedicarunt, & scripserunt. Periculis enim imminentibus, & odio testimonium ingenuum certissime subsequenti minime deterrebantur, nec auro, nec aerae populari, nec vanae gloriae inhiabant; potius his omnibus propter Deum spreto, & civium suorum, & tua etiam vitia ac fidei defectus ingenue fassi sunt, neque illa ullo modo silentio texerunt, aut dissimularunt. Id quod sane optimam de veritatis amore opinionem adfert.

§. XII.

Tertium argumentum externum sumitur a miraculorum conditione, quibus veritas rerum in scriptura confirmari debuit. Cum miracula sint opera merae divinae omnipotentiae, in viribus rerum creaturarum legibusque mutationum, atque proinde natura rerum non fundata sunt, neque in illis habent rationem sufficientem. Ex quo apparet, neminem mortalium miracula strictè dicta vi propria efficere posse. Eiusmodi miracula, cum veritatibus divinis coniuncta fuisse, non solum in sacris litteris affirmatur, sed etiam vestigia rei in scriptis iudaeorum & ethnicorum supersunt. Veteris Testamenti libri satis luculenter perhibent, Deum legatis suis eorumque effatis miraculorum multitudinem ac claritate fidem fecisse. Ipse salvator noster Iesus Christus eiusque apostoli divinam suam legationem, & rerum dicendarum

darum divinitatem miraculis evictam dederunt. Non opus est exempla proferre, quoniam SS. litterae miraculorum narratione referre sunt. Ipsi homines gentiles, & quidem magi coram Pharaone stantes, Mosis miracula patrari digito Dei secundum Exod. VIII, 18. 19. aperte facti sunt.

Loquimur de miraculis stricte sumtis; interest enim inter mirabilia, & miracula. Mirabilia enim i. e. talia quae quia minus solita sunt, admirationem movent, & diaboli, & homines, ut fere quotidie videri est, efficere possunt, sed miracula sunt opera tantum omni potentiae divinae.

§. XIII.

Quartum argumentum ab externis petitum, comprehendit iudaeorum & martyrum testimonium. Constat inter omnes, iudaicam ecclesiam usque ad hunc diem, libros Vet. Test. ipsum Deum habere autorem, uno consensu testari; id quod etiam iudaei re ipsa confirmant, dum libros Vet. Test. pro norma actionum suarum habent, & veneratione fere superstitionis plena codicem Vet. Test. tractant. Ecclesia iudaica prophetis, & respectu librorum novi foederis christiana, apostolis aequalis, hos sanctos Dei viros vidit eorumque scripta inspexit, & de origine divina horum librorum convicta, eos pro divinis agnovit. Martyrum testimonium non minus venit in censum, qui ortum divinum sacrarum litterarum non verbis tantum testati sunt, sed fuso etiam sanguine eundem confirmarunt.

Cum testimonium martyrum inter argumenta pro divina origine SS. litterarum militancia referimus, probe intelligatur necesse est, quis nomine martyris possit insigniri. Dantur enim multi martyres, qui vero non sunt genuinae indolis; hinc probe a genuinis discernendi. Martyres itaque veri nominis sunt, qui vita integri, scelerisque puri sunt, qui ob professionem veritatum divinarum satis cogitarum non modo iniurias & vexationes gravissimas, sed etiam vitae periculum eiusque amissionem forti & constanti animo subierunt. Observandum etiam, de martyribus pri-

14 *De recto & genuino usu argumentorum fidem humanam*

mi aevi hic maxime esse sermonem, qui alia omnia ab ineunte aetate edocti, tam firmiter nihilominus scripturae doctrinam corruptae naturae minime blandientem susceperunt animoque & vita expresserunt, ut potius vitam abiecerint quam illam, vitamque ex illius praescriptis actam; id quod praecipue ex Pauli exemplo luculenter apparet.

§. XIV.

Quintum argumentum externum petitur a religionis christiana propagatione, tam felici, tamque subita, & ab admiranda inter tot eius temporis mala conservatione. Hanc propagationem religionis christiana, cum multae epistolae apostolorum ad varias gentes & urbes missae, tum libri historiarum ecclesiasticarum luculentissime notam faciunt. Christo in caelum everso, apostoli in omnem terrarum orbem digressi, omni populorum generi verbum divinum annunciarunt, multaque hominum millia ipsius verbi divini efficacia mora, ad illius assensum mirifice perduxerunt. Notabile est exemplum Act. II, 42. descriptum, ubi narratur, una concione Petri ter mille homines ad Deum conversos esse, & altera concione Act. IV, 4. numero credentium excrevit ad quinquies mille. Quamvis vero paullo post ethnici imperatores maximo odio erga Christianos inflammati, omnem moverent lapidem, ut Christianos ipsos extirparent, eorumque doctrinas proscriberent atque delerent, tamen doctrina christiana beneficio Dei clementissimi mansit salva, manebitque per omnia secula.

§. XV.

Plura de his argumentis, & internis, & externis proferri possent; sed sufficiant quae exposuimus; hinc ad genuinum & rectum usum horum argumentorum parte I. tractatorum nos accingamus, quem parte II. demonstratum ituri sumus; si modo verbo antea monuerimus, argumenta haec nuper egregie, distincte atque solide tractata atque explanata esse a Venerabili Ministerii Francofurtensis Seniore D. I. P. ERESENIO in narratione

de

facientium in probanda divina origine SS. litterarum. 15
de conversione Naturalistae cuiusdam, lectu dignissima insertaque
Collect. scriptorum pastoralium P. I. N. V. p. 247. seq.

P A R S II.

DE

GENVINO, ET RECTO VSV ARGVMENTORVM,
FIDEM HVMANAM FACIENTIVM, IN PROBANDA
DIVINA ORIGINE SS. LITTERARVM.



§. XVI.

um nemini mortalium sola possessio rerum profit, nisi
iis recte ac prudenter uti sciat, ita quoque argumen-
ta fidem humanam facientia in probando divino or-
tu SS. litterarum, scire nihil attinet, nisi illis quoque
recte uti sciamus. Quod nisi fiat facile accidit, ut non secus
atque aliae res bonae, non suo, sed hominum vitio, haud raro
magis obsint, quam profint ad veram salutem consequendam.
Nos circa gravissimum hoc argumentum ita versabimur, ut
1) illorum errorem redarguamus, qui his argumentis nimium
tribuunt; 2) illos noverimus, qui parum hac in re faciunt, 3) ve-
rum illorum & genuinum usum distinctius doceamus ac probe-
mus; 4) causas ostendamus, cur plerumque his argumentis
non plus efficiatur; crescente quippe in dies contemptu sacra-
rum litterarum doctrinaeque salutaris illis comprehensae.
5) Denique usum horum argumentorum apud vere ac divina fi-
de credentes, indicemus.

§. XVII.

Quod itaque ad *Primum* attinet, illorum scilicet vitium,
qui nimium his argumentis confidunt, illud in eo ponitur, si
quis cognitioni ac tractationi horum argumentorum per vires
naturae ita confidit, ut qualicumque iis effecta fide bonaque de
S. litteris opinione contentus esse velit, eamque sufficere putet
ad

ad necessariam convictionem ac salutem, non curata aut quaesita divina fide per supernaturalem spiritus Dei operationem efficienda. Id quod hodie sane multis contingit, qui in nuda horum argumentorum cognitione & tractatione ita consistunt atque unice haerent, ut longius progredi non laborent, nec de divina fide sint solliciti; qua in re omnino aliquod impietatis mysterium saltem apud multos latere ex sequentibus apparebit. Monuimus iam §. I, usu horum argumentorum cognitionem eo modo ut opus est certam, non posse obtineri, ut scilicet oppositi formido plane evanescat, fiduciaque talis efficiatur, quae animum plane tranquillet, voluntatemque emendet, atque ad amorem veritatis debitum & obsequium flectat. Nimis enim iam corrupta est natura humana, quam ut remedia haec per se licet bona tantis vitiis ac morbis mederi queant. Satis luculenter igitur apparet, fidem salvificam nullo modo in sola cognitione horum argumentorum, efficiendaque per vim illorum naturalem persuasionem consistere posse.

§. XVIII.

Accedimus iam ad *Alterum* illorum scilicet vitium, qui argumenta haec ortum divinum scripturae sacrae probantia, aut profus contemnunt, aut usum illorum nimis extenuant. Licet enim fides divina veritatis divinae, per ipsam veritatem coniunctamque cum illa efficaciam supernaturalem, omnino etiam sine cognitione horum argumentorum distincta & accurata effici possit, prouti innumeris exemplis constat; ex eo tamen neuti quam sequitur argumenta haec eorumque cognitionem negligendam esse. Quanquam enim fidem salutarem efficere per se nequeant, possunt tamen certum hominum genus ad eam praeparare, ut in sequentibus docebimus. Errant itaque, qui simpliciter & apud omnes fidem certam de ortu divino sacrae scripturae, sola remissione ad viam experientiae spiritualis ac supernaturalis, efficiendam putant, spreto omnium horum argu-
mento.

mentorū nullius usus esse. Illi igitur via ibunt tutissima, qui veri similitudinem a priori impetrandam coniungunt cum certitudine a posteriori, seu ex ipsa experientia divina consequendam. Convinci quidem nos ipsi possumus, imo debemus experientia veritatum divinarum de ortu divino SS. litterarum, sed quomodo alios eiusmodi experientiam adhuc negantes, convincere volumus, nisi decens praeparatio adhibeatur? Parum sane aut nihil hoc modo apud illos efficeretur, quibus experientia illa, illiusque capiendae ratio adhuc suspecta esset. Est quoque aliud hominum genus, quod ex alia quidem ratione haec argumenta parvi aut nihili facit. Sunt enim, qui modo singula separatim & sigillatim considerant, ac quasi ponderant, videntes utrum hoc an illud sufficiat ad verisimilitudinem efficiendam. Animadvertentes igitur, hoc, vel illud argumentum separatim positum, non sufficere ad illam rem, triumphant quasi, ac clamant omnibus hisce nihil plane effici, quod scripturam sacram aliis libris diviniorem probet. Id itaque probe notandum, haec argumenta coniunctim esse sumenda, & tunc tantum habere roboris, quantum sufficit ad fidem humanam efficiendam.

§. XIX.

Sequitur nunc *Tertium*, ut scilicet rectum & genuinum usum horum argumentorum ostendamus. Haec argumenta itaque generatim consideranda sunt tamquam praeparantia certum hominum genus, ad internam convictionem de ortu divino librorum divinatorum a Deo ipso efficiendam eo facilius admittendam, removendo maxime impedimenta gravia apud illos, quae si manent operationem verbi Dei supernaturalem irritam reddunt. Habent itaque usum paedagogicum, potissimum apud eorum animos, qui vel plane nihil de religione christiana norunt, vel gravibus dubitationibus vexantur.

C

§. XX.

§. XX.

1) Itaque ad id his argumentis uti possumus ac debemus, ut per illorum propositionem & considerationem bona quasi opinio primo exciteretur in animis, aut plane rudibus, aut contrariis opinionibus occupatis. Qua excitata maior etiam attentio excitatur & adhibebitur ad divinos libros. In nullam enim rem aut librum iniquiores sunt multi mortalium quam, in libros sacros, id quod partim ex eo fit, quoniam nullam attentionem ad illos adferunt, hinc huiusmodi homines sacris litteris haud raro crimini dant & exprobrant, quod in aliis ferunt, excusant, immo saepe laudant. 2) Adhiberi porro debent haec argumenta ad impellendos homines ad seriam lectionem, tractationem ac meditationem librorum sacrorum. Cum enim divina illorum origo per ea admodum probabilis reddatur, omniaque iis comprehensa eo pertineant, ut homo veram aeternamque salutem consequatur, sequitur sane ex eo officium hominis tales libros serio tractandi ac meditandi, cum haec res ad ipsius veram felicitatem, stabilemque ac tutam animi tranquillitatem magnopere intersit. Qui vero haec, quae sane aequissima sunt, debito studio ac diligentia egerit, facile cognoscet, nihil iniquius esse, quam, quod a multis divinae veritatis hostibus fit, qui has, vel illas particulas ex SS litteris arripiunt, separatim tractant ac nescio, quae absurda sibi in illis animadvertere videntur, cum tamen, si, quatenus cohaerent cum aliis, spectentur, facile appareat, bonis idoneisque de causis, haec vel illa esse posita, quae per se considerata, leviora videri possent. Animadvertet etiam facile, qui rem gravem serio atque ex animo agat, omnes divinos libros eo spectare, ut homo sapiens efficiatur ad quaerendam consequendamque salutem, quae per fidem in Christum contingit, proinde causam, si sapit, non videbit, aut aegre ferendi multitudinem & varietatem eorum quae ad hanc rem pertinentia in SS. litteris occurrunt, aut conquerendi de paucitate vel brevi-

brevitate eorum, quae ad eam nihil pertinent, sed aliunde hauriri ac disci, & possunt, & debent. 3) Adhiberi debet persuasio de divinitate horum librorum, ex debita consideratione horum argumentorum oriens, ad cognoscendum officium adhibendumque omne studium agendi illa & praestandi, quae libri hi tamquam omnibus servanda praescribunt, fugiendique quae vetant, quaeque simul ita aperte sunt comparata, ut veritatis amans officiaque, non excaecata cupiditate, sed iudicio sano atque incorrupto meriens homo facile animadvertere possit, esse ea longe aequissima, nixa hominis erga Deum aliosque homines habitu, & quoque sua cum ipsius vera utilitate coniuncta. Ecquid enim v.g. aequius, atque iustius esse, aut cogitari potest, ipsa sana ratione iudice, quam lex de Deo plus quam omnes res creatas amando, reverendo, & quidem intimo animo totoque pectore; item, de amando vitae socio tamquam se ipso, & alia plura, quae fufus commemorare nihil attinet. Iure itaque postulari potest ab homine, ut quamprimum veritatem, aequitatemque eorum quae verbum Dei iure exigit, cognoverit, obsequi etiam, & id omni virium contentione agere laborer, nullo inter cognitionem & actionem per nefariam fraudem intervallo interiecto, ac proinde illo, quod cognoscit & potest, fideliter utatur. Quod si vero animadvertet, ut sane attentus quilibet facile animadvertet, & voluntatem, & facultatem necessariam sibi deesse, officio Deo, sibi, aliisque debita ita praestandi, prouti lex divina & quidem iure suo iubet & exigit; si experietur evenire sibi quod Medea ait, ut videat quidem meliora, proberque, at deteriora sequatur; eo ipso simul videbit quamvera sint, quae verbum Dei de corrupto naturali hominis statu ac de necessitate supernaturalis auxilii divini tradit. 4) Ex quibus omnibus denique sequitur, hominem consideratione horum argumentorum eorumque, quae ipsi ipsa tractatione verbi Dei aperiuntur, eo adduci debere, ut Deum ipsum autorem

& fontem omnis boni impleret, ut auxilio suo subveniat, se ad veram ac salutarem sui cognitionem perducatur, viresque largiatur, officia debita debitoque modo praestandi: Nemo sane etiam si nondum divina fide, scripturae sacrae divinam originem certam habeat, iure id recusare potest, cum ex iis, quae debito rationis usu cognosci possunt, necessitas huius officii fluat. Qui vero, ipso servatore id saepius inculcante, in minoribus ac paucioribus ipsi concreditis, quam potest adhuc fidem praestabit, illisque, quae habet, recte utetur, accedente sincera voluntate plura consequendi; illi plura tribuentur, accedente tum supernaturali spiritus sancti operatione, cuius auxilio per ipsum verbum Dei, tanquam instrumentum, divinitus ad eam rem destinatum, ad certam ac divinam fidem originis divinae scripturae sacrae, atque ipsam experientiam vivam ac salutarem veritatum divinarum perduceretur. Qui vero hanc viam ingredi detinetur, sua ipsius culpa dubius & anceps haeret, cum per ipsum steterit quo minus ab errore & dubitatione liberaretur.

§. XXI.

Placet vero paragrapho superiori a nobis dicta, exemplis nonnullis admodum similibus illustrare ex ipsis SS. litteris petitis. Primo loco in medium prodeant Samaritani ad Christum conversi, Ioh. III. Videamus ordinem & modum, quo homines illi, a Christo doctrinaeque salutari S. litteris comprehensa valde alieni, ad fidem divinam ac certam Christi ac proinde etiam ipsius verbi Dei fuerint perducti. a) Venerat ad eos mulier fermonibus Domini & in primis occultorum patefactione commota, *videte hominem*, inquit, *qui mihi omnia, quae feci, dixit, videte, an forte Christus sit?* quo facto ad eum egressi leguntur cives coram visuri & audituri hominem, quem mulieris sermo tanquam singularem plane ac legatum Dei eis descripserat. Bonam itaque opinionem ac spem his hominibus primum per narrata de Domino laudabilia ac singularia, & quidem iure allatam vide-

videmus. Ea vero non erant contenti, sed potius illa tamquam duce utentes excitari se pariebantur, ut ipsum videre, audire atque sermonibus ipsius frui cuperent; quod cum factum esset, usus ac consuetudo ipsius Christi sermonesque quibuscum vis supernaturalis coniuncta erat, divinam apud eos fidem in Christum ac verbum illius effecerunt, ita ut postea dicere potuerint: *credimus iam non amplius propter tuos sermones, (solos scilicet ut in tuo tantum testimonio acquiescamus) ipsi audivimus & cognovimus* (per ipsum vimque illius divinam, quam experti sumus, dicta attente audientes) *hunc esse Christum mundi servatorem.* En exemplum ad nostrum argumentum illustrandum apte aptum, ut breviter doceamus. a) Id quod magnifice de Domino narrata apud aequos homines & animum non de industria obfirmantes primo effecerunt, ut ipsum Dominum videre & audire gestirent, illud argumenta supra exposita apud aequos homines, & non consulto repugnantes efficere, & possunt, & debent, ut scilicet ipsas sacras litteras adeant, id est attente audiant, tractent, ac meditentur. b) Qui id fecerant ex Samaritanis, obedientesque se in iis praestiterant, quae non poterant non probare, ad fidem salutarem ac divinam per ipsos Domini sermones perducebantur; simili ratione ad fidem divinam veritatis verbi Dei perveniet per ipsam illius vim supernaturalem insitam, qui attente illud & cum obsequio illorum, quae aliunde iam pro veris ac rectis probat, tractabit ac meditabitur; quo tandem fiet, ut & ipse simili ratione dicere queat; non iam amplius credo propter haec argumenta solum, ut unice ac maxime in illorum naturali evidentia acquiescam, aut acquiescere in ea sufficere putem, sed ipse divinam verbi huius vim expertus sum, ut omnis mihi de divinitate illius dubitatio praecisa sit. conf. similia i Reg. X. Io. I. 45. sqq. Simili ratione apostoli interdum (semper enim id ab iis aut factum esse, aut, ut fieret, necesse fuisse, probari nequit) apud ethnicos primis principiis Theologiae naturalis utebantur,

ad ethnicismi crassos errores convincendos, viamque evangelio, removendis impedimentis certis, parandam, ut cum debita attentione audiretur; a quibus id factum est, ii ad fidem divinam evangelii ipsa illius vi divina perducebantur, ut ex Cap. XIV. & XVII. Actorum cuius facile apparet, ut plura addere opus non sit. Consentientes nobis Theologos hac in re plures laudare facile esset. Contenti vero erimus breviter ad fidem unice at notabili G. G. ZELTNERI testimonio in notis ad epp. M. RVARI p. 209. ita scribentis: *Veritas divinitasque scripturae sacrae ipsiusque adeo religionis christianae, argumentis primum fidem humanam gigantibus internis externisque, demonstraretur, atque hoc modo praeparatis contra temeraria iudicia animis de verbo Dei ad modestiam animis, spiritui S. verbo suo, doctrinae scripturae s. insita virtute supernaturali, fidem divinam futuro eiusque operationi nobiliori relinquatur. Haec methodus est inter preces, pro huiusmodi hominibus fusas, commodissima. His si non ubique & apud omnes peraeque respondeat eventus, contumaciae id hominum refractoriorum adscribendum, ac divinae providentiae & iustitiae etiam vindictae multa relinquenda sunt.*

De notabilibus Christi rebus apud Samaritanos gestis conferri ac ponderari meretur, insignis disputatio D. PAULI ANTONII Theologi Fridericianae quondam meritissimi *de conversione Samaritanorum* bonae frugis plena, observationibusque gravissimis referta: nec minus egregia eiusdem Theologi iudicia ac monita de vero usu principiorum Theologiae naturalis, legi merentur in tractatione exegetica cap. XIV. & XVII. Actorum. Quae mone re hic et re visum est, quoniam cum nostro argumento sunt coniuncta, simulque etiam temporum & ecclesiae statui convenientia, atque ita comparata, ut ii quorum interest, veram ex iis sobrietatem viamque regiam ac mediam discere queant, quam tenere oportet, qui in alterutram partem labi nolit. facile enim hic, iliacos intra muros peccatur & extra. Non possumus etiam, quin subiciamus adhuc de necessaria coniunctione cognitionis & actionis in negotio hoc, verba Theologi cuiusdam eximii verissima ac

ac plane notanda; ita vero ille; *Qui post prima stamina cognitionis & institutionis naturalis, detrectat cognoscere Deum per viam fidei & gratiae, is non serio & graviter hanc causam tractat, & meretur in vanum currere; hinc etiam omne studium, quod homines videntur adhibere ad cognoscendum Deum per viam rationationis merae, est vel animi irrequieti aestuatio conantis Deo imponere, vel etiam sperantis Deum invenire non dissimilem sibi, vel studium intricandi & obscurandi illa quae recte & cum lubenti obsequio attententi manifesta sunt; vel etiam occupatio ingenii curiosa, dum interim non vacat mediis maxime necessariis & salutaribus.* WEISMANNVS *inslit. Theol. exegetico-dogmat. p. 189.* quam vera haec sint, ex sequentibus apparebit, ubi rem quoque notabili exemplo illustrabimus.

§. XXII.

Accedimus nunc ad *Quartum* disputationis nostrae de vero argumentorum fidem humanam originis divinae S. litterarum facientium usu caput §. XVI. expositum, investigaturi scilicet & patefacturi veras ac principes causas, cur plerumque apud plurimos contemptores ac dubitantes non plus his argumentis efficiatur; crescente quippe in dies S. litterarum contemptu, doctrinaeque salutaris illis comprehensae. Causas vero rei ad eo funestae sitas esse contendimus, cum in multis ex eorum numero, qui argumenta haec in aliorum gratiam, vel voce, vel scriptis tractant & explicant, tum in iis, qui illa aut legunt aut audiunt, quibusque hoc modo succurri & consuli debet. Non adeo multum apud multos his argumentis effici in aperto est. Quod effectum nostrum ne quis per invidiam & obrektionem calumnietur, probe observari volumus, nos minime affirmare nihil plane illis effici. Exstant enim omnino exempla illorum Dei beneficio licet pauciora, qui his argumentis ad attentionem praeparati, aequissimisque praeeptis obsecuti virtute Dei supernaturali ad fidem salutare ac divinam veritatis revelatae sunt perducti; inter quae admodum notabile illud est quod supra iam laudavimus

mus a Vener. D. FRESENIO Part. I. *scriptorum pastoralium* enarratum. Exstant etiam exempla illorum, qui horum argumentorum vi ac perspicuitate eo perducuntur, ut aliquam S. litteris reverentiam habeant, nec aperti hostes & contemptores illarum evadant; licet in hoc consistant, supernaturalemque illarum vim ad fidem divinam ac salutem non suscipiant & experiantur. Causas itaque huius rei ex parte in multis eorum ponimus, qui haec argumenta aut voce, aut scriptis, in aliorum gratiam tractant, quorum nostra ac superior aetas ingentem proventum tulit. Ut enim in praesenti taceamus, non aeque solide, perspicue atque ad fidem aliis faciendam apte omnes in hoc negotio versari; aliae adhuc graves restant causae, cur labor multorum hac in re non efficiat, quod si cetera essent paria efficere posset ac deberet, eoque minus nobis negligendae, quo magis negliguntur a plurimis. *Primo* enim nonnulli in nuda explicatione horum argumentorum consistunt, nec iis utuntur ad id, ad quod uti deberent; ex quo fit, ut multi lectores & auditores pariter non longius progredi cogitent, quam duces illorum; contenti scilicet persuasione aliqua bonaque opinione de scriptura S., minime vero illa utentes ad ea agenda, quibus ad divinam fidem perducii possent. *Secundo*; multum omnino ad persuadendum aliis his argumentis interest, illos ipsos, qui persuadere volunt, fidem etiam divinam ortus divini S. litterarum habere, verosque illius fructus efficaciaeque verbi Dei supernaturalis ferre atque ostendere. Sicuti enim in medicina sanandisque aegris corporibus non sufficit, bona suaque natura efficacia ad depellendum morbum remedia cognita habere, sed multum quoque interest ad sanationem per illa, medicum quoque qui ea adhibeat, & prudentem & fidum esse, quo ea recte adhibere & possit & velit; ita in animorum sanatione non minus interest, illos qui aliis medicinam cum fructu ac successu facere volunt, recte esse comparatos, ac proinde non solum praefidiis huma-

humanis ac naturalibus, sed etiam divinis ac supernaturalibus instructos, quo in tanto negotio recte versari, & possint, & velint. Qui vero ipse *ψυχικός* tantum est & spiritus expers (*ψυχικός* vero ex Pauli sententia quilibet est, qui Spiritum Dei non in se habitantem ac dominantem habet, licet scientia rerum divinarum naturae viribus comparata sit instructus) primo nec debito ac vero amore Christi & hominum ducitur, nec veram aliorum salutem ex animo & vere sibi habet propositam, sed sibi & commodis suis maxime & cum detrimento causae Dei & hominum servit; ex quo fieri necesse est, ut multa fugienda ab eo fiant, contra multa facienda praetermittantur: in quibus tamen multum momenti est, aut ad consequendum aut impediendum salutarem effectum, prouti recte vel secus quis in iis versatur. Ut taceamus in omnibus his saepe gubernationem divinam singularem, auxilium praeterea ac benedictionem divinam esse necessariam piis precibus impetrandam; ad quas cum homo vera fide ipse non praeditus, veritatisque divinae ac spiritus sancti pulsibus ac voluntati non cedens & obtemperans ineptus sit, facile apparer, quam multa hoc ipso impedimenta obiiciantur, quo minus salutaris effectus ex remediis per se bonis consequi possit. Denique parum ille plerumque efficit apud errantes, qui veritatem quidem verbis commendat & extollit, re vero ipsa, animo scilicet ac vita illam conculcat. Facile enim illis, quibus commendare vult, suspicionem adferet, ipsum non ex animo credere, quod aliis persuadere vult, aut actionem eorum valde necessariam non putare, quae quidem facienda praescribit, at ipse non facit. Ex quo facile est ad intelligendum, tali docentium statu, homines huiusmodi ad debitam attentionem excitari non posse, qua tamen quam maxime opus est, si ipsa veritas vim suam in animis exserere debeat. Contra vero fides divina & obsequium veritatis verum ac spiritus sancti virtute effectum, fructibusque spiritus se ostendens efficere potest, ut primo apud homines bona opinio de bonitate & veritate do-

D

Arinae

Strinae sacrae excitetur vel augeatur, quando apud illos, qui profitentur, bonos ac dignos fructus vident; qua re via ad maiora paratur. Idem plane Deus populo iudaico olim iam proponi, verbumque suum obsequio exteris & alienis commendari voluit; ita enim legimus Deut. IV, 6. *Tenete igitur & facite. Id enim (cognitio scilicet verbi mei & actio) erit sapientia vestra & intelligentia*, (i. e. laudem sapientiae & intelligentiae vobis adferet) *in oculis populorum qui audient constitutiones has, & dicent; tantum populus sapiens & intelligens gens haec magna est.* Ita scilicet verbum Dei in animo primo spiritus s. opera insitum & conceptum ornat hominem, deinde vero ab illo fructibus bonis ornari vult & commendari. Conf. etiam Rom. II, 17-24. Tit. II, 1-10. 1 Tim. IV, 12-16. 1 Petr. III, 1. 2.

§. XXIII.

Accedunt etiam causae, cur parum apud multos his argumentis efficiatur, in illis ipsis positae, quibus argumentorum horum explicacione consuli debet. Proferemus autem potiora. Primo itaque apud haud paucos voluntarius stupor, summa carnalis securitas, dissolutioque ac remissio animi in omni cura animae aeternorumque cogitatione est in culpa, quo minus ad attentionem aliquam excitari queant. Vivunt & agunt, quasi sibi ipsi tantum vel huic vitae negotiisque illius vivere oporteret. Deum fingunt & iudicant ex se; ex quo fit, ut quemadmodum ipsi Deum, divinaque non curant, ita quoque a Deo se & humana non curari autumant: sic re vera, ut barbari in diem vivunt, atque nec verbum Dei ipsum, nec praeparantia ad illius usum consideratione aliqua dignantur. Deinde apud multos in culpa est voluntaria animi obstinatio propositumque, vim argumentorum talium apud se comprimendi, illamque variis rationibus undique conquisitis elevandi & oppugnandi, nullam aliam, si res ex vero aestimetur, ob causam, quam quia doctrinas revelatas oderunt; quo voluntatis vitio fit, ut omnia respiciant & indignentur, quae illarum veritatem vel aliquo modo persuada-

persuadere possent. Quis enim ignorat vim depravatae voluntatis in intellectum humanum, qua efficitur, ut intellectus illa a quibus voluntas abhorret, non debita attentione perpendat, contra vero innumera & haud raro pluma & spuma leviora excogitet, quae veritati opponat, ne iniuria illam aspernari videatur. Accedit apud nonnullos pessimo saeculi errore, ut tum demum ultra vulgus mortalium sapere, acutique & emunctae naris homines sibi esse videantur, si iugum veterum praeceptorum opinionum (in quarum numero doctrinae etiam divinitus patefactas habent, mysteria imprimis humano ingenio incomprehensibilia) fidenter & cum supercilio excusserint. Accidit ergo revera huiusmodi hominibus quod Paulus pronuntiat 2 Thess. II, 10. ut gravissimis erroribus constringantur, levissimisque rationibus veritati divinae contrariis capiantur atque excaecentur, quoniam amorem veritatis ingenuum suscipere noluerunt. Porro sunt etiam alii & quidem haud pauci, apud quos argumentis his praeparantibus adeo nihil efficitur, ut potius omnia rideant & contemnunt, nullam plane aliam ob causam, quam quia veritas S. litteris comprehensa cupiditatibus illorum pravis repugnat, quibus tamen fervire & indulgere ipsis certum, ac proinde etiam propositum est nihil audire & considerare, quod vel eminus cupiditati obesse videtur. Huiusmodi homines res divinas hanc ob causam maxime consideratione dignas non putantes, Petrus iam notavit de irrisoribus novissimorum temporum adfirmans, eos ideo irridere &, quae ad intelligendum facilia sint, intelligere non posse, quia cupiditatibus fervire constitutum habeant (2 Epist. III, 2. 1q. coll. Io. III, 19. 20.). Denique apud multos nihil efficitur, quod, ne in iis quidem rebus S. litterarum praeceptis obtemperare volunt, quas tamen per se probare ipsi pro rectis & faciendis coguntur. Ex quo apparet rem seriam ab huiusmodi hominibus non agi serio, nullamque debitam in iis sollicitudinem inesse in veritatis cognitione progrediendi. Notabile eius rei exemplum nobis succurrit, quod



verbis Vener. PRAESIDIS proferemus in praefatione ad vitam Lutheri Herrnschmidianam §. L. LI. p. 66, ita vero ibi legitimus; commodum in praesenti succurrit, quod nobis de meritissimo quodam Theologo iamque aevum in beatissimo animorum concilio apud Christum agente certis auctoribus, qui ex ipso optimo viro audiverunt, innotuit. Provocavit illum aliquando insigni confidentia homo Atheus illustri loco natus, religionis omnis contemtor, ad certamen, quod ille minime detrectans duo tantum sibi pactus est; unum, ut quae inter ipsos in disputando expensis, collatisque rationibus conventura essent pro certis posita ac probata, litteris consignarentur, ne forte sui in disputando obliti atque adeo ab iisdem semper initiis proficiscendo coacti ad nullius rei exitum pervenirent; alterum, ut fidem daret sibi que reciperet, se peccata quaecunque & crimina, quae idoneis argumentis convincerentur, non amplius in se admissurum, contra vero illis operam daturum, quae bona ac recta probarentur. Hoc audito disputator ille qui provocaverat, primam quidem conditionem se accepturum respondit, ad alteram vero descendere se posse negavit. Qua hominis confessione Theologus ille usus ostendit ipsi, rem maxime seriam, minime serio neque ex animo ab illo agi veritatemque non admitti, non, quo nimis obscura aut intellectu difficilis sed, quia ingrata & invisus sit. Profecto si alii huius generis homines, qui in fausto consilio sales suos in irridenda religione consumunt, complicatam notionem animi sui evolvere vellent, idem ipsis usu venturum certo nobis persuasum habemus.

§. XXIV.

Restat *Quintum* breviter adhuc, cum difficultatem non habeat, expediendum, ut scilicet usum horum argumentorum etiam apud illos ostendamus qui divinitus divinam S. litterarum originem persuasam habent. Possent quidem talia his videri, nulli usui esse: sicuti enim lucernae lumen solis lumine ita obruitur & obscuratur, ut in hoc ambulantis illo opus non sit, ita quoque in lumine divino ortum S. litterarum divinum certenti-

mentibus atque experientibus, opus esse non videtur, lumen illud tenuius adhibere atque ad id videre velle. Verum enim vero licet libenter ipsi concedamus, id non simpliciter, nec omnibus esse necessarium, ex eo tamen non consequitur, nulli plane usui id esse posse. Primo enim voluptatem certe adfert & quidem merito divinam fidem habentibus, si vident verbum Dei eiusmodi vestigiis ortus sui divini a Deo esse signatum, quae etiam nondum divinitus persuasis, venerationem tamen aliquam illius bonamque opinionem adferre possunt. Quemadmodum itaque vestigia providentiae divinae aliis in rebus notant ac venerantur, atque ex iis & ipsi fructum capiunt & Deo ferunt, ita quoque hac in re id faciunt, id quod nunquam bono apud illos fructu caret. Deinde fides divina retro quasi valet, usuque suo ac lumine in cognitionem & considerationem horum argumentorum funditur, ut in supernaturali lumine etiam quasi collocata & visa conferant aliquid ad firmitatem animi augendam. Sicuti itaque illum iuvat ac delectat, qui rem bonam & utilem in tenuiori lucernae lumine primo visam & aliquo modo cognitam, deinde in solis lumine multo clarius ac melius videt ac cognoscit; ita quoque iuvat illum, qui argumentorum horum vim primo in naturae lumine tantum visam, postea in divino gratiae lumine longe melius perspicit. Denique incidunt etiam interdum tempora, quibus sensus luminis divini obscuratur & subtrahitur credentibus, ut sibi in tenebras pristinas recidisse videantur; ex quo fit ut dubium illorum animis fiat, quod antea certum plane habebant. In huiusmodi statu regredi omnino licet imo prodest interdum ad argumentorum horum considerationem, quae cum usu reliquorum remediorum divinitus praescriptorum coniuncta, prodesse idque id inprimis praestare potest, ut animus per eam subinde extimuletur ad magis indefessum ac perpetuum remediorum modo tactorum usum, donec sensus divini luminis, dispulsisque dubitationum nebulis sol quasi redeat.

§. XXV.

Haec sunt quae in praesenti de hoc argumento commentari volumus ac poruimus: Deo interim optimo maximo gratias, quas possumus, maximas pro auxilio nobis praestito benignaque virium largitione, ad scriptum hoc exarandum, agimus, cum voto, ut aliquod saltem ex ea re, cum in nosmet ipsos, tum in alios redundet commodum.

F I N I S.



ORNATISSIMO DISPUTATIONIS
AVCTORI AC DEFENSORI

S. D.

P R A E S E S.

Quod ad tractandum disputandumque delegisti argumentum, ORNATISSIME BAER, ex illorum numero fuit, quae TIBI a me rogatu TVO demonstrata sunt. Causas vero huius consilii mei hic indicare aut explicare eo minus necesse est, cum & faciles iis sint ad perspicendum qui oculos apertos atque in statum temporum nostrorum intentos habent, & in ipsa quoque disputatione TVA non intactae manserint. Utinam discerent aliquando homines in ecclesia bona per se ac recta, quorum scientiam habent, expoliumt & tradunt, ad verum & debitum usum referre, idque ex animo agere, ut non tam iactatores illorum quam auctores sinceri amatoresque fierent. Quod vero ad ipsum scriptum TVVM attinet, in priori illius parte, qua argumenta ipsa fidei humanam efficientiam explicantur, pauca admodum a me sunt mutata, singulis plerumque modo verbis ac sententiis aut positis aut indutis; In altera vero parte, quae usum illorum exponit, paulo plura fateor mihi & mutare & supplere consultum visum est. Ad TE ipsam convertor, ORNATISSIME BAER, cum habeam quae de TE & TIBI breviter dicam. De TE igitur hoc aliis affirmare possum, cognitum TE mihi fuisse per omne commorationis TVAE academicae tempus, tamquam auditorem industrium, modestum morumque probitate conspicuum. TIBI vero pro mea in TE benevolentia, quid & optem TVA causa, & sperem breviter adhuc dicendum habeo. Opto itaque, adhortans simul ad id quod opto, ut ipse fideliter id agas, quod in disputatione TVA praecepisti, ac proinde omni studio in id incumbas, ut divina apud TE rerum divinarum fides ante omnia efficiatur, atque sic etiam apud alios aliquando cum fructu urgeatur. Spem vero de TE concepisti fore, ut monitorum eo pertinentium memor vivas, ecclesiaeque aliquando vere utilem operam praestes; quam quo melius implebis aut superabis, eo maius quoque in TE ipsum redundabit emolumentum. Dab. in Fridericiana VI. Calend. Octob. MDCCLVII.

Most.

* * *

Most-Honoured Sir,
Most-Beloved Friend!

Tis always laudable to acquire some Merit by usefull and such Writings, which have a great Influence upon Religion, and make it easy as well as agreeable. You have given, *Dear Friend*, to the learned World by this Essay of Yours a plain Proof of Your deep Insight, and of that praise-worthy Industry in Treating of an usefull and not ordinary subject. You have shewn thereby, that Your chiefest Purpose is, to spread abroad the Glory of God. I congratulate You upon so praise-worthy an Endeavour, and am overjoy'd, that I can boast of being an ancient Friend of Yours. I flatter my self to persuade thereby many others, that I have profited by Your Knowledge. Pray, *Most-Honoured Sir*, allow unto me this delightfull Idea and believe, that I shall rejoice so much the more, the longer You will vouchsafe unto me Your Friendship. Your Kindness, solid Knowledge, Ingenuity, skill, and others excellent Qualities of Your Mind shall further be, as they have hitherto been, a Pattern of my Imitation. I acquaint You publickly and most heartely by these few Lines with my Thanks for Your constant Friendship, and that it is what I desire to be favoured with in the future; tho' the Evidence of it cannot be performed personally in my Absence. Adieu, *Dear Friend*, our Lord may most graciously bless all Your Actions, and Your pious and most usefull Undertakings; Farewell and believe surely, that I am with all Respect, Love and Tenderness during all my Life

Dear Friend

Your most-humble Servant and most-devoted Friend,

Paul Christian Lentz,

Student in Divinity

natif of Oldenborough, Opponent.

at Hall in Saxony September
th. 27. 1757.

Nur den, welcher geschäftig nach grünendem Lorbeere geizet,
Mit welchem der Göttin Hand die Stirne des Jünglings umwindet;
Dessen empfindbare Brust, die kein Glanz des Pöbels mehr reizet,
Der Weisheit mächtiger Strahl zum höherem Range entzündt;
Wenn, ganz Gefühl, ganz zum Ohr umgebildet, er gedankenvoll höret,
Wie von ihren göttlichen Lehren ihr heiliger Tempel erschallt,

E

Wie



Wie sie das Dunkel zum Tage umschafft, und Empfindungen lehret,
 Daß Klarheit den Geist und der Tugend Gefühl die Aern durchwallt;
 Nur den kennt die Weisheit als Sohn und schmückt ihn mit Würde,
 Die, gleich Diademen von fürstlicher Stirne, sein Leben unstrahlt,
 Sieht seine löblichen Werke und führt ihn zur göttlichen Zierde
 In ihren Tempel, wo Lorbeer und Ruhm seinen Eifer bezahlt . . .
 Und führt sie Jhn, den Treuesten ihrer Sie liebenden Söhne,
 Jhn, den Freund, führt sie Jhn iezzo nicht auch in ihr Heiligtum hin?
 Mütterlich rief sie: Komm, o Baer, komm! kämpfe in herrlicher Scene
 Zum Ruhm, Sohn! für Dich und der Mutter, und stürze den Ir-
 thum dahin.

Also sprach sie: Und, Freund, wie willig folgst Du der Lehre?
 Schon siehet mein Blit Dich gekrönt und Deinen erfochrenen Sieg.
 Theile Deine Freundschaft nicht mit mir diese siegprangende Ehre?
 O Tag sei mir heilig! Und, o Freund, liebst Du nicht ferner auch mich?

Halle, den 27 Sept.
 1757.

Theodor Ludwig Matthison,
 der G. G. Bestiffener, aus dem Magdeburg.
 Opponens.

C A R I S S I M O F R A T R I

S. P. D.

IOANNES GOTTHILFF BAER,

S. S. THEOL. STUDIOS.

En litteras brevissimas, *Carissime Frater* amoris vero affectus plenas. Mea perdoleo fara, quod varia apparuerint obstacula, quo minus huic certamini erudito interesse, Teque Tuae scriptionis defenforem ipse experiri possim: eo magis non possum non absens hisce litteris animi mei laetitia amorisque affectum publice Tibi designare. Mirum in modum laetor & ex animo gratulor de cognitionis Tuae Theologicae specimine eoque restante de tempore Tuo academico non inutiliter peracto. Nihil magis in votis habeo, quam ut Deus indulgentissimus studiis Tuis impostherum sit propitius, Tibique omnia fausta & prospera esse iubeat, vt, curriculo academico feliciter finito, ex conaminibus Tuis in veritatibus divinis discendis iisque applicandis, tam in civitatem Dei, quam in Te ipsum fructus redundant salutares. Fave impostherum mihi, vale & rem Tuam age feliciter. Dab. Kerbelitzae prope Magdeburgum d. XX. Sept. MDCCLVII.



00 A 6359

ULB Halle 3
002 916 746




1007

Repro ✓







DISPUTATIO THEOLOGICA
DE
RECTO ET GENVINO VSV
ARGVMENTORVM FIDEM HV-
MANAM FACIENTIVM IN PRO-
BANDA DIVINA ORIGINE
S. LITTERARVM.

24

QVAM
PRAESIDE
VIRO SVMME REVERENDO, EXCELLENTISSIMO,
DOCTISSIMO
IOANNE GEORGIO KNAPP
THEOL. DOCT. EIVSDEMQUE PROF. ORDIN.
PATRONO SVO AC PRAECEPTORE
PIE COLENDO,
IN REGIA FRIDERICIANA
D. I. OCTOB. MDCCLVII.
ERVDITORVM EXAMINI SVBICIET
AVCTOR
CAROLVS SAMVEL BAER
KERBELITZA-MAGDEBVRGICVS.



HALAE MAGDEBVRGICAE
LITTERIS HENDELIANIS.